

REGIONAL NEWS UNIT
ALL INDIA RADIO, AGARTALA
Date: 02-05-2024
Time: 07:55-08:05 PM Hrs
BENGALI EVENING BULLETIN

Headlines :

(১) রাজ্যপাল ইন্দ্রসেনা রেডিও নাল্লু রক্তদানের পাশাপাশি অঙ্গদানের অঙ্গীকারে সবাইকে এগিয়ে আসার জন্য আহ্বান জানিয়েছেন ।

(২) ত্রিপুরা মধ্যশিক্ষা পর্ষদ পরিচালিত এবছরের মাধ্যমিক এবং উচ্চ মাধ্যমিক পরীক্ষার ফলাফল আগামী ২০ থেকে ২৫ মে এর মধ্যে প্রকাশ করা হবে।

(৩) আগরতলা থেকে গুয়াহাটিগামী একটি বেসরকারি যাত্রীবাহী বাস দুর্ঘটনায় কমলপুরের এক যুবকের মৃত্যু ও ৪৫ জন বাস যাত্রী আহত ।

(৪) এবছর রাজ্যভিত্তিক রবীন্দ্র জন্মজয়ন্তী ধর্মনগরের বিবেকানন্দ সার্থ শতবার্ষিকী ভবনে উদযাপন করা হবে ।

(৫) টিসিএ পরিচালিত তপন স্মৃতি ঘরোয়া নকআউট ক্রিকেট প্রতিযোগিতায় সংহতি ক্লাব চ্যাম্পিয়ন হয়েছে ।

Governor-MBB University :

রাজ্যপাল তথা মহারাজা বীর বিক্রম বিশ্ববিদ্যালয়ের আচার্য ইন্দ্রসেনা রেড্ডি নাল্লু রক্তদানের পাশাপাশি অঙ্গদানের অঙ্গীকারে সবাইকে এগিয়ে আসার জন্য আহ্বান জানিয়েছেন। আজ এই বিশ্ববিদ্যালয়ে রক্তদান শিবিরে উদ্বোধনী ভাষণে রাজ্যপাল এই আহ্বান জানান। তিনি বিশ্ববিদ্যালয়ের বর্তমান কার্যক্রমের ভূয়সী প্রশংসা করেন এবং আগামীদিনে এই বিশ্ববিদ্যালয়ের আরো সাফল্য কামনা করেন। বিশ্ববিদ্যালয়ের উপাচার্য অধ্যাপক সত্যদেও পোদ্দার তাঁর বক্তব্যে বিশ্ববিদ্যালয়ের সাফল্যগুলিকে তুলে ধরেন, পাশাপাশি এই বিশ্ববিদ্যালয়ের বিভিন্ন সমস্যা সম্পর্কে রাজ্যপালকে অবহিত করেন। বিশ্ববিদ্যালয়ের নিবন্ধক ডঃ সুমন্ত চক্রবর্তী রাজ্যপালকে স্বাগত জানান। এই রক্তদান শিবিরে মোট ১৬ জন ছাত্রছাত্রী রক্তদান করে। রাজ্যপাল বিশ্ববিদ্যালয়ের ছাত্রছাত্রীদের সঙ্গে আজ মত বিনিময়ও করেন।

TBSE :

ত্রিপুরা মধ্যশিক্ষা পর্ষদ পরিচালিত মাধ্যমিক এবং উচ্চ মাধ্যমিক পরীক্ষার ফলাফল আগামী ২০ থেকে ২৫ মে এর মধ্যে প্রকাশিত করা হবে। পর্ষদের সভাপতি ডক্টর ধনঞ্জয় গন চৌধুরী আকাশবাণীকে এক সাক্ষাৎকারে আজ এ খবর জানান। তিনি জানান, এবছর মাধ্যমিকে প্রায় ৩৩ হাজার ছাত্রছাত্রী ও উচ্চমাধ্যমিকে প্রায় ২৩ হাজার ছাত্রছাত্রী পরীক্ষায় দিয়েছে। গত ২৪ এপ্রিল থেকে দুটি পরীক্ষারই উত্তরপত্র দেখা শুরু হয়েছে। আগরতলায় মাধ্যমিকের উত্তরপত্র দেখা হচ্ছে কামিনী কুমার স্কুল, বোধজং বালিকা বিদ্যালয়, বিজয় কুমার বালিকা বিদ্যালয় এবং বাণী বিদ্যাপীঠ বালিকা বিদ্যালয়ে। উচ্চ মাধ্যমিকের উত্তরপত্র

দেখা হছে নেতাজি সুভাষ বিদ্যানিকেতন এবং বড় দোয়ালী উচ্চতর মাধ্যমিক বিদ্যালয়ে। পৰ্ষদ সভাপতি আরো জানান, তিনি আশা করছেন, আগামী ১২ মে-র মধ্যেই মাধ্যমিক এবং উচ্চ মাধ্যমিকের উত্তরপত্র দেখার কাজ শেষ হয়ে যাবে।

Accident :

আগরতলা থেকে গুয়াহাটিগামী একটি বেসরকারি যাত্রীবাহী বাস গতকাল রাতে প্রায় সোয়া বারোটা নাগাদ আসামের ডিমাহাসাও জেলার ডিটেকছড়া এলাকায় দুর্ঘটনায় পড়ে। এতে দেবরাজ দেববর্মা নামে কমলপুরের এক যুবকের মৃত্যু হয়। আহত হয়েছেন ৪৫ জন বাস যাত্রী। যাত্রীদের মধ্যে অনেকেই সমবায় ব্যাঙ্কের পরীক্ষা দেবার জন্য আগরতলা থেকে গুয়াহাটি যাচ্ছিলেন। এই দুর্ঘটনায় দেবরাজ দেববর্মার মৃত্যুতে মুখ্যমন্ত্রী অধ্যাপক ডাঃ মানিক সাহা, কেন্দ্রীয় প্রতিমন্ত্রী প্রতিমা ভৌমিক গভীর শোক প্রকাশ করেছেন এবং শোকসন্তপ্ত পরিবার পরিজনদের প্রতি গভীর সমবেদনা জানিয়েছেন। তারা আহতদের দ্রুত আরোগ্য কামনা করেছেন।

এই ঘটনায় আহতদের প্রয়োজনীয় সহায়তা প্রদানের জন্য রাজ্য সরকারের পক্ষ থেকে ডেপুটি কালেক্টর এবং মেজিস্ট্রেট জিনিয়াস দেববর্মা চিকিৎসক অরিন্দম দাসকে ঘটনাস্থলে পাঠানো হয়েছে।

এদিকে, বাস দুর্ঘটনায় এক পরীক্ষার্থী মৃত্যু এবং বহু পরীক্ষার্থীর আহত হবার ঘটনায় ডিওয়াইএফআই এবং টিওয়াইএফ এর পক্ষ থেকে আজ আগরতলায় ত্রিপুরা স্টেট কো-অপারেটিভ ব্যাংকের সামনে বিক্ষোভ প্রদর্শন করেন। এই দুটি সংগঠন নিহত যুবকের

পরিবারে আর্থিক ক্ষতিপূরণ এবং আহতদের আর্থিক সহায়তা করার জন্য রাজ্য সরকারের কাছে দাবি জানিয়েছে।

Joint Entrance :

ত্রিপুরা জয়েন্ট এন্ট্রান্স পরীক্ষা আজ অনুষ্ঠিত হয়। জয়েন্ট এন্ট্রান্স বোর্ডের চেয়ারম্যান ড: রাজা চক্রবর্তী জানান, এবছর প্রায় ছয় হাজার ছাত্রছাত্রী পরীক্ষায় বসে। আগরতলায় ১১টি কেন্দ্রে এবং রাজ্যের অন্যান্য স্থানে আরো ছয়টি কেন্দ্রে এই পরীক্ষা নেওয়া হয়। সবকটি পরীক্ষা গ্রহণ কেন্দ্রেই পরীক্ষা শান্তিপূর্ণভাবে হয়েছে বলে শ্রী চক্রবর্তী জানান। তিনি জানান, চলতি মাসের শেষ দিকে পরীক্ষার ফলাফল প্রকাশ করা হবে।

N F. Railway :

পার্বত্য কাছাড় জেলা ও নিম্ন আসাম, মেঘালয়ের পার্বত্য এলাকায় গতকাল রাতে প্রবল বৃষ্টিতে যোগাযোগ ব্যবস্থা বিঘ্নিত হয়। সোনারপুর ও ডিমাহাসাও দুই দিকেই জাতীয় সড়কে যান চলাচল আটকে পড়েছে। এন এফ রেলওয়ের মুখ্য জনসংযোগ আধিকারীক সসব্যসাচী দে জানিয়েছেন, লামডিং ডিভিশনের জাটিঙ্গা লামপুর এবং নিউ হারাঙ্গজাও স্টেশনের মধ্যবর্তী স্থানে রেললাইন মেরামতের কাজ হলেও গতকালের প্রবল বৃষ্টি পাতের ফলে ট্রেন লাইনের কিছু জায়গায় ফের ধস নামে। তবে দূর পাল্লার কিছু যাত্রী ট্রেন চলাচল করলেও মালবাহি ট্রেন চালানো যাচ্ছে না বলে তিনি জানান।

Rabindra Jayanti-State Level :

শিক্ষা দপ্তরের উদ্যোগে এবছর রাজ্যভিত্তিক রবীন্দ্র জন্মজয়ন্তী আগামী ৮মে ধর্মনগরের বিবেকানন্দ সার্থ শতবার্ষিকী ভবনে উদযাপন করা হবে। অনুষ্ঠানে আলোচনাচক্র, সমবেত রবীন্দ্র নৃত্য, সংগীত, আবৃত্তি, নৃত্যনাট্য, নাটক ইত্যাদি বিভিন্ন অনুষ্ঠানসূচি রাখা হয়েছে। এই অনুষ্ঠান সর্বাঙ্গীণ সুন্দর করে তোলার লক্ষ্যে গতকাল উত্তর ত্রিপুরা জেলা শিক্ষা আধিকারিকের কার্যালয়ে এক সভা অনুষ্ঠিত হয়। সভায় উপস্থিত ছিলেন জেলা শিক্ষা আধিকারিক সুখময় নাথ, শিক্ষা দপ্তরের অধিকর্তা কার্যালয়ের ওএসডি মহম্মদ সেলিম, জেলা তথ্য ও সংস্কৃতি কার্যালয়ের যুগ্ম অধিকর্তা দিলীপ কুমার দেববর্মা, শচীন দেববর্মা, স্মৃতি সরকারি মিউজিক কলেজের অধ্যক্ষা ড. মনিকা দাস প্রমুখ।

NSS :

তীব্র গরম থেকে কিছুটা স্বস্তি দিতে বানী বিদ্যাপীঠ দ্বাদশ শ্রেণি বালিকা বিদ্যালয়ের এন.এস. এস সেলের ব্যবস্থাপনায় আগরতলার শংকর চৌমুনীতে পথচারীদের মধ্যে ঠান্ডা পানীয় জল বিতরণ করে। শিশুদের ঠান্ডা পানীয়ের সঙ্গে চকলেটও দেয়া হয়।

Water Distribution :

প্রচল্ড গরম থেকে স্বস্তির জন্য আজ মহারাজগঞ্জ বাজার কেন্দ্রীয় ব্যবসায়ী সমিতির উদ্যোগে মহারাজগঞ্জ বাজার এলাকায় শ্রমিকদের মধ্যে ঠান্ডা পানীয় জল বিতরণ করা হয়।

এদিকে, যুব মোর্চার উদ্যোগে আজ আগরতলা বটতলা এলাকায় পথ চলতি মানুষের মধ্যে তরমুজ ও ঠান্ডা পানীয় জল বিতরণ করা হয়। লেক চৌমুহনি বাজারে পোলষ্টার ক্লাবের উদ্যোগেও পথচারীদের মধ্যে ঠান্ডা পানীয় ও ফল বিতরণ করা হয়।

Rain & Lighting-Sepahijala :

দীর্ঘ অনাবৃষ্টির পর আজ বিকেল থেকে সিপাহীজলা জেলার বিভিন্ন এলাকায় বিক্ষিপ্তভাবে বৃষ্টি শুরু হয়েছে। বৃষ্টি চলাকালীন সোনামুড়ায় বজ্রাপাতে ২ জন আহত হয়। তারা হলেন সোনামুড়া আড়ালিয়া গ্রামের শারমিন আক্তার ও NC নগরের চিনু বেগম। বর্তমানে এই দুইজন সোনামুড়া হাসপাতালে চিকিৎসাধীন।

ECI :

নির্বাচন কমিশন আজ সমস্ত জাতীয় এবং রাজ্য রাজনৈতিক দলগুলিকে অবিলম্বে যে কোনও বিজ্ঞাপন, সমীক্ষা বা অ্যাপের মাধ্যমে নির্বাচন-পরবর্তী সুবিধাভোগী-ভিত্তিক প্রকল্পগুলির জন্য ব্যক্তিদের নিবন্ধন করা সংক্রান্ত কোনও কার্যকলাপ বন্ধ করতে বা এই ধরনের কাজ থেকে বিরত থাকার জন্য একটি পরামর্শ জারি করেছে।

কমিশন বলেছে, নির্বাচন-পরবর্তী সুবিধার জন্য নিবন্ধন করতে ভোটারদের আমন্ত্রণ জানানোর কাজটি ভোটারদের প্রলোভন দেবার পর্যায়ে পড়ে।

কমিশন সমস্ত জেলা নির্বাচন আধিকারিকদের এই জাতীয় যে কোনও বিজ্ঞাপনের বিরুদ্ধে যথাযথ ব্যবস্থা নেওয়ার নির্দেশ দিয়েছে।

Campaign :

বরিষ্ঠ বিজেপি নেতা প্রধানমন্ত্রী নরেন্দ্র মোদি বলেছেন যে বিজেপি সরকার সারা দেশে শান্তি নিশ্চিত করে সন্ত্রাসবাদের উপযুক্ত জবাব দিয়েছে। আজ গুজরাটের জুনাগড়ে এক সমাবেশে ভাষণ দেওয়ার সময়, শ্রী মোদি কংগ্রেসের বিরুদ্ধে বিভাজনমূলক রাজনীতিতে জড়িত থাকার অভিযোগ আনেন।

এদিকে, কংগ্রেস নেতা এবং রাজস্থানের প্রাক্তন মুখ্যমন্ত্রী অশোক গেহলট আহমেদাবাদে এক সাংবাদিক সম্মেলনে বলেন, কংগ্রেসের ইশতেহার সমাজের প্রতিটি অংশে ন্যায়বিচারের নিশ্চয়তা দেয়। শ্রী গেহলট দেশের গণতন্ত্রের নিরাপত্তা নিয়ে উদ্বেগ প্রকাশ করেছেন এবং বিজেপি সরকার মুদ্রাস্ফীতি ও বেকারত্বের মতো প্রধান বিষয়গুলিকে উপেক্ষা করেছে বলে সমালোচনা করেন।

Cricket :

টিসিএ পরিচালিত তপন স্মৃতি ঘরোয়া নকআউট ক্রিকেট প্রতিযোগিতায় সংহতি ক্লাব চ্যাম্পিয়ন হয়েছে। এর ফলে সংহতি ক্লাব এই মরশুমে ত্রিমুকুট জয় করলো। আজ এম বি বি স্টেডিয়ামে অনুষ্ঠিত আসরের ফাইনাল খেলায় সংহতি ক্লাব ১৩৪ রানে কসমোপলিটান ক্লাবকে পরাজিত করে। প্রথমে ব্যাট করতে

নেমে সংহতি ক্লাব ৪৭ ওভার ২ বল-এ সবকটি উইকেট হারিয়ে ২২৩ রান করে। দলের পক্ষে শ্রীদাম পাল ৬১ ও অরিন্দম বর্মণ ৫৪ রান করে। কসমোপলিটানের ধনবীর সিং ২২ রানে ৪টি উইকেট পায়। জবাবে কসমোপলিটান ক্লাব ২২ ওভার ৫ বল-এ মাত্র ৮৯ রানে সবাই আউট হয়ে যায়। দলের পক্ষে চন্দন রায় অপরাধিত ৩২ রান করে। সংহতির সম্রাট সূত্রধর ২১ রানে তিনটি উইকেট পায়।

Senior Cricket-Santirbazar :

শান্তিরবাজার ক্রিকেট এসোসিয়েশন আয়োজিত মহকুমা সিনিয়র ক্রিকেট টুর্নামেন্ট চ্যালেঞ্জার ট্রফির দ্বাদশ ম্যাচে মুহুরীপুর জনকল্যাণ সমিতি ৬ উইকেটে কুষ্কারঘাট তরুণ সংঘকে পরাজিত করেছে। আজ বাইখোড়া মাঠে প্রথমে ব্যাট করতে নেমে কুষ্কারঘাট তরুণ সংঘ ২৭ ওভারে ১৫৪ রান সংগ্রহ করে। জবাবে বিজয়ী দল ১৫ ওভার ১ বলে ৪ উইকেট হারিয়ে জয়ের প্রয়োজনীয় রান তুলে নেয়।

Weather :

আগামী চব্বিশ ঘন্টায় উত্তর জেলায় বিক্ষিপ্তভাবে ভারী থেকে অতি ভারী বৃষ্টিপাত এবং পশ্চিম জেলায় বিক্ষিপ্তভাবে ভারী বর্ষণের সতর্কতা জারি করেছে আবহাওয়া দপ্তর। আগামী কাল আকাশ সাধারণত মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। তাপমাত্রা সর্বোচ্চ চৌত্রিশ ডিগ্রী এবং সর্বনিম্ন ছাব্বিশ ডিগ্রী

সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল সাঁইত্রিশ দশমিক চার ডিগ্রী এবং সর্বনিম্ন আঠাশ দশমিক আট ডিগ্রী সেলসিয়াস। রাজ্যের সব জেলায় বিক্ষিপ্তভাবে বজ্র বিদ্যুত সহ বৃষ্টি সঙ্গে ঘন্টায় চল্লিশ থেকে পঞ্চাশ কিলোমিটার বেগে ঝড়ো হাওয়া বয়ে যাওয়ার ও সতর্কতা জারি করা হয়েছে।
